

Na osnovu člana 16. stav 4. Zakona o Vladi Zeničko-dobojskog kantona-Prečišćeni tekst („Službene novine Zeničko-dobojskog kantona“, broj: 7/10), a u skladu sa Programom utroška budžetskih sredstava u 2012. godini, usvojenim Zaključkom Vlade Zeničko-dobojskog kantona, broj: 02-14-15234/12 od 28.06.2012. godine, na prijedlog Ministarstva za privredu, Vlada Zeničko-dobojskog kantona, na 71. sjednici, održanoj 17.07.2012. godine, d o n o s i

ZAKLJUČAK

I.

Usvaja se Postupak i kriteriji za odobravanje i dodjelu (refundiranje) sredstava poticaja namijenjenih subvencioniranju povećanja iskorištavanja kapaciteta u ugostiteljskim objektima skupine „hoteli“, koji čini sastavni dio ovog zaključka.

II.

Za realizaciju poticaja iz tačke I. zadužuje se Ministarstvo za privredu, koje će donijeti sve provedbene akte i imenovati komisiju za provođenje propisanog postupka.

III.

Zaključak stupa na snagu danom donošenja.

Broj: 02-_____/12.
Datum, 17.07.2012. godine
Z e n i c a

PREMIJER

mr.sci.Fikret Plevljak dipl.ing.

DOSTAVLJENO:

1x Ministarstvo za privredu,
1x Ministarstvo finansija,
1x a/a.



POSTUPAK I KRITERIJI
ZA ODOBRAVANJE I DODJELU SREDSTAVA POTICAJA NAMIJENJENIH
SUBVENCIONIRANJU
POVEĆANJA ISKORIŠTAVANJA KAPACITETA
U UGOSTITELJSKIM OBJEKTIMA SKUPINE "HOTELI"

Zenica, juli/srpanj 2012. godine

1. UVOD

Prema zvaničnim statističkim podacima udio broja turista i turističkih noćenja evidentiranih u Zeničko - dobojskom kantonu u odnosu na Federaciju tokom posljednjih nekoliko godina je bilježio stagnaciju.

Na području Kantona je registrovano oko 350 privrednih subjekata koji se bave ugostiteljstvom i turizmom, od čega je oko 30 hotela i motela (sa oko 1000 kreveta), te oko 20 turističkih agencija.

Obzirom na geografsku poziciju Kantona, posebno uzevši blizinu centara kao što su Sarajevo, Tuzla, Travnik i Doboj, te da kroz teritoriju Kantona prolaze najznačajnije komunikacije u Federaciji Bosne i Hercegovine, jasno je da su prethodni podaci izuzetno skromni.

Na ovaj način se može zaključiti da su i svi drugi efekti od turizma nezadovoljavajući.

Identificirani problem, nedovoljnog iskorištavanja raspoloživih kapaciteta, produkuje izuzetno niske finansijske efekte privrednih subjekata u turističkoj djelatnosti. To je posljedica niza subjektivnih i objektivnih okolnosti.

Bitno je istaći da se aktivnost u mnogim subjektima iz ove oblasti svodi uglavnom, na organizaciju turističkih putovanja izvan Zemlje i Kantona, tako da su oni više prevoznici i turistički agenti privrednih subjekata izvan Bosne i Hercegovine. Na ovaj način turistički potencijali u Kantonu ostaju neiskorišteni.

U ovakvoj situaciji neki subjekti pribjegavaju nezakonitom poslovanju, što još više usložnjava stanje u ovoj oblasti.

2. IZVORI I NAMJENA POTICAJNIH SREDSTAVA

Sredstva za subvencioniranje povećanja iskorištavanja kapaciteta u ugostiteljskim objektima skupine "hoteli", na području Zeničko - dobojskog kantona, obezbjeđuju se iz Budžeta Zeničko - dobojskog kantona za svaku godinu, a planiraju se Programom utroška sredstava u Ministarstvu za privredu, te odgovarajućim odlukama Vlade Kantona, kojima se uređuju izdvajanja i transferi prema korisnicima.

Radi obavještanja potencijalnih korisnika o mogućnostima dobivanja sredstava poticaja Odluke Vlade Kantona objavljuju se u "Službenim novinama Zeničko-dobojskog kantona" i sredstvima javnog informisanja, u formi Javnog poziva za dodjelu poticaja, te na oficijelnoj web stranici Vlade Kantona.

Na kraju budžetske godine Ministarstvo će izvjestiti Vladu i Skupštinu Zeničko-dobojskog kantona o realizaciji poticaja.

U cilju povećanja stepena iskorištenja smještajnih kapaciteta u ugostiteljskim objektima skupine "hoteli" kao i zbog niza drugih efekata, Vlada Kantona će organizatorima (ugostiteljskim objektima skupine "hoteli" i turističkim agencijama) subvencionirati dio troškova za smještaj i boravak turističkih grupa u hotelima i motelima na području Zeničko - dobojskog kantona, počev od 01.01.2012. godine.

3. KORISNICI POTICAJA, TURISTIČKA GRUPA, SMJEŠTAJ I BORAVAK

Korisnici poticaja, u duhu ovog Postupka i kriterija, su privredni subjekti iz Zeničko - dobojskog kantona -turističke agencije i ugostiteljski objekti skupine "hoteli", registrovani za obavljanje djelatnosti smještaja i pružanja ugostiteljskih usluga turističkim grupama, u kategorisanim objektima, na području Zeničko-dobojskog kantona.

Skupinu "hoteli" čine sljedeće vrste ugostiteljskih objekata: hotel, hotelsko naselje, aparthotel, apartmansko naselje, pansion i motel.

Pod turističkom grupom, podrazumjeva se grupa od 5 i više lica koja organizirano koristi potpunu uslugu u ugostiteljskom objektu skupine "hoteli".

Pod smještajem i boravkom turističke grupe, podrazumjeva se dvodnevni smještaj i boravak (dva puna pansiona ili dva polupansiona) u jednom objektu, te uredno evidentiran nakon 01.01.2012. godine.

Pod punim pansionom podrazumijeva se noćenje sa doručkom, ručkom i večerom, a pod polupansionom noćenje sa doručkom i ručkom ili večerom.

Cijena punog pansiona, koja se subvencionira je 80 KM.

Cijena polupansiona, koja se subvencionira je 60 KM.

4. IZNOS POTICAJA

Vlada Kantona će korisnicima subvencionirati dio troškova smještaja turističkih grupa preciziranim u tački 3. ovog Postupka i kriterija.

Osnovica za izračunavanje visine poticaja je ukupan trošak boravka turističke grupe, a što se dokazuje dokumentacijom o uredno plaćenju i prijavljenoj usluzi smještaja i boravka turističke grupe.

Visina poticaja je 10% ukupnog iznosa troška boravka turističke grupe po cijeni utvrđenoj u tački 3. ovog Postupka i kriterija.

U slučaju zajedničkog angažmana, 50% poticaja pripada turističkoj agenciji, a 50% ugostiteljskom objektu koji je pružio usluge smještaja, boravka i ishrane, navedenom u tački 3. ovog Postupka i kriterija.

Ukupna visina poticaja po jednom objektu ne može biti veća od 20.000,00 KM, godišnje.

5. ZAHTJEV ZA ODOBRAVANJE I ISPLATU POTICAJA

Zahtjev za odobravanje i isplatu poticaja dostavlja se Ministarstvu za privredu kvartalno ili polugodišnje.

Uredan Zahtjev sadrži original ili ovjerenu kopiju:

- Odobrenja za obavljanje djelatnosti za fizička lica ili izvod iz sudskog registra za pravna lica,
- Odobrenja za upotrebu objekta izdatog od nadležnog organa,
- Rješenja o kategorizaciji objekta i/ili ispunjavanju minimalnih uslova ,
- Dokaz o uredno izmirenim troškovima boravka turističke grupe,
- Dokaz o uredno prijavljenom boravku turističke grupe,
- Uvjerenja o uredno izmirenim porezima i indirektnim porezima, ne starije od 60 dana, računajući od dana podnošenja zahtjeva,
- Uvjerenja o uredno izmirenim doprinosima za socijalno i zdravstveno osiguranje, ne starije od 60 dana, računajući od dana podnošenja zahtjeva.

6. KOMISIJSKA OCJENA I NEGATIVNO RJEŠENJE

Komisiju za ocjenu ispunjavanja uvjeta i kriterija za dodjelu sredstava potencijalnim korisnicima poticaja imenuje i razrješava ministar Ministarstva za privredu.

Za svoj rad Komisija odgovara ministru Ministarstva za privredu.

Komisija razmatra Zahtjeve potencijalnih korisnika poticaja poštujući hronologiju prijema istih na protokolu Ministarstva, odnosno Vlade, te cijeni ispunjavanje uvjeta i kriterija za odobravanje sredstava.

Izveštaj o ocjeni i mišljenje, Komisija dostavlja ministru Ministarstva za privredu. U slučaju da Komisija ocjeni da nisu ispunjeni svi uslovi za odobravanje sredstava poticaja, Ministarstvo za privredu, kod neispunjenja uvjeta i kriterija, donosi Obavijest, koju prosljeđuje podnosiocu zahtijeva.

7. POSTUPAK ODOBRAVANJA

Na osnovu Izveštaja i mišljenja Komisije, Ministarstvo za privredu predlaže Vladi Kantona donošenje Odluke o odobravanju poticaja. Pojedinačne odluke Vlada donosi shodno raspoloživim sredstvima za tekuću godinu, a prednost u odobravanju sredstava poticaja ima onaj korisnik koji je ranije podnio zahtjev i za koga je utvrđeno da i ispunjava sve uvjete, te zadovoljava kriterij dodjele.

Ukoliko se prije isteka budžetske godine utvrdi da raspoloživa budžetska sredstva nisu dovoljna, dio zahtjeva se može prenijeti u narednu godinu.

8. REALIZACIJA POTICAJA

Na osnovu Odluke o odobravanju sredstava Ministarstvo za privredu podnosi Nalog za isplatu sredstava Ministarstvu finansija.

9. RANIJE VAŽEĆI AKTI, KRITERIJI I POSTUPCI

Stupanjem na snagu ovog Postupka i kriterija stavlja se van snage i prestaje važiti Postupak i kriteriji za odobravanje i dodjelu sredstava poticaja namijenjenih subvencioniranju povećanja iskorištavanja kapaciteta u ugostiteljskim objektima skupine "HOTELI", usvojen Zaključkom Vlade Zeničko – dobojskog kantona, broj: 02-14-14166/11 od 12.05.2011. godine.